

過去一切諸佛起七寶塔以一切供而供養之阿難若現在佛及聲聞僧以諸樂具盡壽供養阿難未來諸佛及諸菩薩悉為奴僕及為弟子而供養之不聞是經不受不持不讀不誦不轉不住離是等法不名供養諸佛如來阿難若有菩薩聞於是經受持讀誦為他廣說如說修行而是菩薩已為供養三世佛已何以故阿難如說修行則是如來調伏之法說是語已大德阿難郁伽長者乾闥婆世間天人阿脩羅等聞佛所說皆大歡喜

大寶積經卷第八十二

大寶積經卷第八十三

始三

大唐三藏法師菩提流志奉詔譯

無盡伏藏會第二十之一
如是我聞一時佛在王舍城耆闍崛山與大比丘眾一千人俱皆悉成就殊勝功德能師子吼菩薩摩訶薩五百人一切皆得陀羅尼

門辯才無礙證無生忍住不退轉具諸三昧遊戲神通善知眾生心行所趣其名曰日幢菩薩月幢菩薩普光菩薩月王菩薩照高峯菩薩毗盧遮那菩薩師子慧菩薩功德寶光菩薩一切義成菩薩成就宿緣菩薩成就願行菩薩空慧菩薩等心菩薩喜愛菩薩樂眾菩薩戰勝菩薩慧行菩薩電德菩薩勝辯菩薩師子吼菩薩妙言音菩薩能警覺菩薩巧轉行菩薩寂滅行菩薩如是等菩薩摩訶薩而為上首復有釋提桓因四大天王娑婆世界主梵天王及大威德諸天龍夜叉乾闥婆阿脩羅迦樓羅緊那羅摩睺羅伽如是等無量諸大眾俱爾時電德菩薩見諸大眾寂然清淨諸大龍象皆悉已集即從座起偏袒右肩右膝著地合掌向佛白言世尊我有少疑今欲諮問惟願如來見垂聽許爾時世尊告電德菩薩言如來應正等覺恣汝所問當為汝說電德菩薩白佛言世尊菩薩摩訶薩成

就何法能滿衆生一切所欲不爲諸過之所
染著隨其根性方便引導令彼衆生身壞命
終不墮惡趣決定當得證於平等處世無染
猶如蓮華不動法界遊諸佛刹常不離佛不
見色身住三解脫不入正位隨衆生欲嚴淨
佛土於剎那頃速能成就阿耨多羅三藐三

菩提尔時電德菩薩摩訶薩即於佛前以偈
問曰

無上人中尊 無邊知見者 安住於共法
利益諸世間 等心視衆生 爲世所依怙
示諸邪正道 令畢竟安樂 積集勝功德
猶如衆寶聚 世間智慧日 三界應供尊

願說最上乘 成就菩薩道 面相如滿月
具足奢摩他 開示寂靜法 能滅諸煩惱
願說菩薩行 饒益諸衆生 佛刹并壽命
色身與眷屬 三業及諸法 一切皆清淨
惟願如來說 清淨菩薩行 云何降伏魔
云何而說法 云何不忘失 惟願爲宣說

云何勇進者 遍入於生死 安住一相中
於法常無動 云何諸佛所 親近而供養
常觀佛色身 畢竟離諸相 雖證三解脫
如鳥飛空界 未具諸功德 終不入涅槃
知諸根性欲 隨順無所畏 亦不生染著
成熟彼衆生 先施世間樂 後令發淨心

具足殊勝智 證無上菩提 如是深妙義
惟願如來說

尔時世尊告電德菩薩摩訶薩言善哉善哉
善男子乃能問佛如是之義利益安樂無量
衆生攝受現在世間天人及未來世諸菩薩
等是故電德應當諦聽善思念之當爲汝說

電德菩薩言唯然世尊願樂欲聞佛告電德
菩薩摩訶薩有五種伏藏大伏藏無盡伏藏
遍無盡伏藏無邊伏藏菩薩具足如是伏藏
求離貧窮即能成就如上所說殊勝功德以
少功力速疾當得阿耨多羅三藐三菩提云
何爲五所謂貪行伏藏嗔行伏藏癡行伏藏

等分行伏藏諸法伏藏電德云何名為菩薩摩訶薩貪行伏藏謂諸眾生貪行相應顛倒繫縛隨行諸相種種分別於色聲香味觸法等諸境界中執著堅固耽樂昏迷菩薩於彼諸眾生等種種心行應如實知彼諸眾生何所樂欲於何境界染習增強具足成就何等

始三

三

信解往昔曾種何等善根於何乘中當得發趣所有善根又如成熟菩薩為斷諸眾生等一切欲故令彼善心常相續故審諦觀察而為療治電德當知眾生根行差別難識一切聲聞辟支佛所不能知何況凡夫及諸外道是故電德或有眾生雖著諸欲亦能成熟阿

耨多羅三藐三菩提或有眾生纔觸欲境或以染心發於語言便得成熟無上明脫或有眾生觀諸妙色心生欲染彼色變壞即便覺知欲惱便息深念無常則能成熟無上明脫或有眾生雖見女人不生貪著於後思念方起染心想彼形容而生愛戀或有眾生於其

夢中見可意色心生貪著繫念追求或有眾生聞女人聲便生貪愛有時暫見離貪染心便得成熟無上明脫是故電德菩薩於是種種貪病及以貪藥善巧了知而於法界無有二相於此迷惑法界眾生起大悲心電德若貪嗔癡若法界智無有少法而可得者菩薩

作是念言如我所見是諸眾生於此無相自性空寂假名安立和合法中起於貪欲嗔恚愚癡我當於此如實觀察為彼迷惑貪欲眾生住於大悲成滿昔願不動法界以無功用智而成熟之若有丈夫於彼女人妄生淨想起重貪染菩薩即便示現女身端正殊妙色

相具足珍寶纓絡種種莊嚴猶如天女昔所未見隨彼眾生令其愛著極貪戀已量彼堪任方便拔其貪欲毒箭以自在力還變女身現其人前而為說法令彼眾生通達法界便沒不現若有女人於彼丈夫心生愛染菩薩便為現丈夫身乃至拔其貪欲毒箭而為說

法令入法界便沒不現電德是諸貪行二萬一千及彼諸行八萬四千菩薩無功用智出生無量億千法門開曉衆生悉令解脫而亦不念我爲衆生如是說法亦無衆生得解脫者電德譬如無熱龍王以業力故於其宮內出四大河爲諸衆生水陸住者夏時熱惱而

始三

四

作清涼潤澤花果滋實五穀令諸衆生安隱使樂而彼龍王不作是念我今令此河水流已出當出然於四河常自汎滿爲衆生用菩薩亦復如是成就昔願以無功用智說四聖諦滅除一切生死熱惱普施人天聖解脫樂而是菩薩亦不念言我今說法已說當說

任運住於大悲之心觀察衆生隨應說法復次電德譬如帝釋有十二那由他諸天女等以彼帝釋自在力故現其多身令諸天女於彼欲樂皆得滿足各自念言我今獨與帝釋歡娛而是帝釋實無所染菩薩亦復如是於諸衆生應可度者隨其意樂而成熟之然是

菩薩亦無染著復次電德譬如日輪出山峯時光明普遍照闍浮提所照之處青黃赤白種種形色皆悉顯現而彼日輪一色一光無差別相菩薩亦復如是智慧日輪照於法界出彼衆生執著山峯所緣一相隨其意樂而爲說法然於法界無有二相電德是名菩薩

摩訶薩貪行伏藏菩薩證得此伏藏已或於一劫或過一劫隨諸衆生種種意樂現無量身以種種言詞而爲說法然於法界亦無二相復次電德譬如真金由工巧力隨意所作種種纓絡莊嚴之具其相各異而彼金性無有差別菩薩亦復如是善觀法界隨諸衆生

始三

五

種種意樂現無量身以種種言詞而爲說法然於法界亦無二相是爲常入法界一相菩薩獲得如是伏藏能爲衆生種種說法彼聞法已具足富有無盡聖財生死貧窮悉皆永斷復次電德云何名爲菩薩摩訶薩瞋行伏藏謂諸衆生憍慢相應計我我所住自他相

從久遠來不修慈忍瞋恚熱惱自壞其心於佛法僧不生憶念瞋毒所覆迷惑於法菩薩於彼多瞋眾生終不起於損害傷惱唯作是念奇哉眾生愚癡迷惑乃於諸法本性寂靜無垢濁無和合無違諍遠離法中顛倒相應妄生瞋恨如是念已住大悲心常自懇惻設

有支解其身分者為欲調伏瞋行眾生安住忍辱若彼無量瞋行眾生互相違背心懷恚恨是業成已當墮毒蛇惡趣之中住忍菩薩以慈念力化此眾生能令不受惡趣之報決定當得證於平等是名菩薩善巧方便滅除眾生瞋恚之行復次電德菩薩若見瞋惱眾

生作是念言一切諸法本性清淨此諸眾生隨相而行妄生分別於此平等無違法中而起瞋心彼諸眾生於法界性不能了知若此眾生見法性者終不於他而生忿害以不了知法界本性是故生瞋菩薩於彼多瞋眾生倍增慈愍住於大悲成滿昔願以無功用智

為壞眾生瞋恚行故開示演說種種法門而亦不念我為眾生除瞋說法何以故菩薩善觀法界相故是為菩薩安住法界無差別相滅煩惱行電德譬如不除黑闇得現光明亦非無能除黑闇者如是黑闇及光明性皆如虛空無有差別菩薩亦復如是依此法界無

差別智善巧說法摧滅種種瞋行眾生不於法界而作差別電德譬如日輪所出光明隨所照處皆日輪攝菩薩亦復如是為欲調伏滅除瞋行所有言說皆是法輪不於法界而作差別如是瞋行二萬一千及彼諸行八萬四千菩薩成就無功用智隨彼眾生種種瞋

卅三

六

行而為說法不作是念我為眾生今現說法已說當說是名菩薩摩訶薩瞋行伏藏菩薩證得此伏藏已若於一劫若過一劫隨諸眾生種種意樂以種種文字語言方便演說不能得其瞋行邊際而是菩薩智慧辯才亦不可盡是名菩薩善說法界無差別相獲得如

是瞋行伏藏復次電德云何名爲菩薩摩訶
薩癡行伏藏電德諸菩薩等如是之行甚爲
難事謂諸衆生隨惑行者惱害他者無明胎
殼所纏裹者如蚕處蠶自繫縛者於法界中
無方便者不善觀察所應行者著我見者行
邪道者住鈍行者難出離者爲如是等迷惑

衆生從初發心起大加行不生疲苦亦無懈
怠如是思惟應以何緣何等勝解云何說法
令此衆生入菩薩行而得解脫菩薩往昔善
觀法界以無功用智住於大悲知彼衆生迷
法界已隨力所堪而爲說法悉令調伏亦不
念言我今說法已說當說以彼往昔誓願力

故善觀緣起自然演出百千法門斷除衆生
無明業行令得解脫電德譬如良醫善療衆
病先善綜習醫方諸論纔見病相皆悉了知
呪藥所施無不除愈菩薩亦復如是善觀法
界以無功用智爲彼積習癡行衆生隨其根
性開示演說百千法門悉令明了電德是名

七

七

菩薩摩訶薩癡行伏藏菩薩證得此伏藏已
善觀緣起爲如是等癡行衆生若於一劫若
過一劫隨其性欲以種種文字語言善巧演
說不能得其癡行邊際而是菩薩智慧辯才
亦不可盡是名菩薩於一切法無差別相善
巧宣說獲得如是癡行伏藏如是癡行二萬

一千及彼諸行八萬四千菩薩爲斷如是行
故開示演說百千法門是名菩薩癡行伏藏
復次電德云何名爲菩薩摩訶薩等分行伏
藏譬如四面鏡輪清徹明淨無諸垢翳懸於
四衢所對色像皆於中現無有增減而此明
鏡亦不念言我能現此種種色像然善磨瑩

此鏡輪已一切諸相自然而現菩薩亦復如
是法界鏡輪善磨瑩已住無功用三昧隨諸
衆生心行差別開示演說百千法門悉令了
知皆得解脫不起法相及衆生相何以故菩
薩善觀法界相故於此四行相應衆生如實
了知隨其根性而爲說法而於法界及衆生

界如實觀察無有二相亦所法界及衆生界明見無二無差別故電德譬如虛空無有種種差別之相亦無建立菩薩亦復如是善觀法界了一切法入於一相亦由往昔誓願力故隨衆生行種種說法而於法界無有差別電德此等分行二萬一千及彼諸行八萬四

千菩薩觀察悉皆明了譬如良醫知病投藥以無功用智種種說法是名菩薩摩訶薩等分行伏藏菩薩證得此伏藏已爲諸衆生若一劫若過一劫隨其志樂以種種言詞善巧宣說不能得其諸行邊際菩薩智慧辯才亦不可盡是名菩薩善說法界無差別相獲得

如是等分行伏藏

大寶積經卷第八十三

第八末

始三

大寶積經卷第八十四

始四

無盡伏藏會第二十七之二

大唐三藏法師善提流志奉詔譯

復次電德菩薩成就如是智已於諸衆生根行意樂善巧了知若見多貪衆生爲欲調伏療其病故示同凡夫現受諸欲具有妻子家

業資生猶如蓮華而不染著有諸衆生癡無智慧不知菩薩善巧方便而作是念何有智者貪受諸欲不異凡夫便謂菩薩遠離菩提如是衆生心不淨故起大瞋忿不生敬信由此業故身壞命終墮大地獄復以菩薩密化因緣罪報畢已決定當得入於平等電德譬

如猛火隨投草木一切熾然悉成於火菩薩亦復如是智火熾然所有衆生若貪瞋癡若善不善菩薩於彼與之同行一切熾然皆成智慧是名菩薩不共之法又如須彌山王不共之相所謂四面四寶所成隨諸衆生青黃赤白種種色相彼若往詣瑠璃面者皆同一